

Adostasuna txostenetan eta ezusteko lehendakargia UPNren Kongresuan

Jesus Aizpuni kargua kentzeko asmoz aurkeztu da Jose Angel Zubiaur

Aurkeztutako hiru txostenen inguruan lortutako adostasuna eta pasiloetako mugimenduak izan ziren UPNren IV. Kongresuaren ezaugarriak lehen egunean. Gaur egingo den karguen hautaketari dagokionez, azken uneko ezustea: Jose Angel Zubiaur alderdiko lehendakartzarako aurkeztu da.

ANA UNANUE / IRUÑEA

Zubiaurren kandidatura kenduta, azpimarratzeko gauza gutxi kongresuaren hasieran, dena espero zen moduan gertatu baitzen. Aldez aurretik adostuta zeuden hiru txostenak —arautegiari buruzkoa, politikoa eta ekonomikoa— aho batez onartu zituzten. Hala ere, jende aurrean agertutako batasun itxurak bestelako aurpegia erakutsi zuen pasiloetan: azpijokoak eta zurrumurruak. Alderdiko sektore ezberdinen azken mugimenduak eta deiak ziren, gaur egingo den karguen hautaketan isladatuko direnak.

Ekitaldia goizeko hamarretan hasi zen, Iruñeko Anaitasuna kiroldegian. Kongresura UPNko 5.000 kideak deituta bazeuden ere, bostehun besterik ez ziren agertu —gaurko partehartze handiagoa espero da—. Jesus Aizpuri alderdiko lehendakariaren agurraren ondotik, Rafael Gurria idazkari nagusiak azken urteko jardunari buruzko balantzea egin zuen.

Segidan Miguel Sanz lehendakariordea mintzatu zen, UPNren arautegiari buruzko txostenaren defentsan. Txostena, beste biak bezala, aho batez onartu zuten. Kargu ezberdinetarako kandidaturak aurkezteko epea zabaldu zen orduan. Atsedendiarekin batera, eguneko ezustea: Zubiaurrek lehendakartzarako aurkeztu zuen bere burua. Iragarpenak sortutako marmarra isildu baino lehen heldu zen txosten politikoaren irakurketa.

DEL BURGO ETA ALLIREN TXOSTENAK

Txostena defenditzeko denbora erdibana hartu zuten Juan Cruz Allik eta Jaime Ignacio Del Burgok, Sanzek «berritzaileak» eta «kontserbadoreak» deitzen dituen sektoreetako buruek alegia. UPNren baitan «sentsibilitate ezberdinak» daukela aitortu ondoren, aipatu txostena «adostasunaren emaitza» dela azpimarratu zuen Allik. Era berean, UPN eta PPNren arteko hitzarmenaren «arrakasta» nabarmendu zuen.




Alde ezberdinen arteko adostasuna izan zen txostenetan.

JOXE

UPNren definizioari dagokionez, bere alderdia «zentrista, foralista eta popularra» dela azaldu zuen. Halaber, foralismoaren esanahia zehaztu nahi izan zuen. Alliren esanetan, «Foralista izateak zera esan nahi du, Nafarroaren berezitasuna defenditzen dela, nazionalitate historikoa den aldetik. Gure autogobernua ez da atzokoa, baizik eta mila urteko historia duena. Horregatik, Estatu espainiarrari onartzen diogun muga bakarra batasun konstituzionala da, ez besterik».

Del Burgoren hitzaldia lau aldiz eten zuten jendearen txaloek. PPko kide ohia UPNren definizio nazionalistaren kontra agertu zen: «Nazionalista izena erabiliz gero, beste nazionalistekin



Jose Angel Zubiaur.

JOXE

nahastuko gaituzte, Espainiaren proiektua onartzen ez duten horiekin. Eta gu ez gara horietakoak, nafarrak izateagatik espainolak garelako». Ildo beretik, alderdian batasuna lortzeko dei egin zuen. «UPN zatituz gero, nork irabaziko luke?», galdetu zuen Del Burgok. Erantzuna berak eman zuen: «Euskal nazionalismoak eta sozialistek, noski».

«Nafarroatik, Espainiarekin, Europarako», lemaekin bukatu aurretik, honako hau bota zuen Del Burgok: «Badakigu zer garen, bere nortasunaz jabetutako herria. Baina horretarako ez dugu Rh negatiboaren premia edota burezura neurtu beharrik, Alemaniako nazien antzera. Aski dugu arrazoiak».

Zubiaur: «Nire izen eta abizenekin»

A.U. / IRUÑEA

■ Jose Angel Zubiaurren kandidatura ezagutzean, galdera bera egin zuten kazetari guztiak: «Noren sostengua du honek?». Batetik, atzo arte ziurtzat jotzen zelako inork ez ziola lehiarik egingo Aizpuni eta, besteik, Zubiaurrek ez duelako politika aktiborik egin azkenaldian.

Aizpunekin batera UPNko sortzaileetako izan arren, Allirekin oso harreman onak ditu. Hori dela eta, bere aurkezpene berritzaileen azpijokoaren ondorio izan dela uste dute batzuk. Zubiaurrek berak, berriz, ukatu

egin zuen sektore baten edo bestearen aldekoa denik: «Nire izen eta abizenekin aurkeztu naiz, A, B eta C sektoreak daudela ikusita beharrezkoa dela iruditu zaidako. UPNk batasuna behar du aurrera egiteko». Aizpunek «ongi» iritzi zion Zubiaurren ekimenari. Hala ere, «gal dezala» desiatu zion, berak lehendakartzari eusteko asmoa baitu.

Allik eta Del Burgok, bestalde, ez zuten argitu Zubiaurren edo Aizpunen aldeko botoa emango duten gaur. «Biak hautagai onak dira eta aukera egitea ez da batere erraza izango», adierazi zuen Allik.

Berritzaileen buruak gaurkoa «botere borroka hutsa» izango dela esan zuen, ezberdintasun ideologikoak baztertuz. Alliren arabera, «UPNren jatorrizko izpiritua berreskuratu beharrik ez du funtsik, ez delako ezer galdu. Hori diotenean botere egarria ezkutatuta nahi dute». Batzorde eragilean gehiengo lortzea espero duela ere esan zuen. Eta logikaz horrela izan beharko luke, III. Kongresuaz geroztik bere kontrolpean egon da eta. Dena den, atzo nahiko zuhur eta motel agertu ziren berritzaileak, indarrez betetako Del Burgoren aldean.

Hiru zerrenda batzorde eragilearen hautaketarako

A.U. / IRUÑEA

UPNk PPri lotu eta Nafarroako Gobernua eskuratuta gero egiten ari den lehen Kongresu honetan alderdiaren kontrolak sortu du borroka latzena. Goi karguetarako zein agente organoetarako bozketak gaur goizean egingo dira eta emaitzatik eguerdi aldera ezagutuko dira.

Azkenean hiru zerrenda aurkeztu dira batzorde eragilean gehiengo lortzeko asmoz. Berez zerrenda irekiak dira, baina praktikan bozkatu beharreko izenak ahoz aho ezagutarazten dira eta zerrenda itxiak gertatzen dira. Berrikuntza bat sartu dute bozketan: batzorde eragilearako 21 kide aukeratu behar badituzte ere, 14 izen bakarrik hauta ditzake bakoitzak. Horrela, sektore irabazleak ez du batzorde eragile osoa kontrolatuko, bi heren baizik.

Juan Cruz Allik sektore berritzaileko izenekin osatu du bere zerrenda: Alfredo Jaime, Lopez Borderias, De Leon, Catalan, Markotegi, Campoy, Cipres, Labaien, Abadia, Gaiarre, Morras, Igal eta Ruiz. Jaime Ignacio Del Burgok UPNko zenbait historikorekin egin zuen tratua, zerrenda bateratua aurkezteko, baina Jose Javier Viñesek beste zerrenda bat egin du bere kabuz. Horrela, jatorrizko zerrenda kontserbadoreari —Del Burgo, Aiesa, Aliaga, Gracia, Labarga, Toledo, Palacios, Basterra, Del Castillo, Chorrut, Iribas, Jimenez, Manero eta Martin— beste zazpi izen gehitu dizkio, Del Burgoren baimenik gabe.

VINESEN EKIMEN «ITXURAGABEA»

Senadorearen ekimenak Del Burgoren haserre piztu zuen. Izan ere, izen gehiago agertzean boto sakabanaketak bera kaltetzen du. Hori dela eta, Viñesek alderdiko lehendakariordetzarako aurkeztu zuen kandidatura ez duela sostengatuko iragarri zuen. Allik oraindik gogorragoa izan zen, Viñesek egindakoa «itxuragabekeria» zela esan baitzuen.

Goi kargu ziur bakarrik Rafael Gurriarena da oraingoz. Lehendakartzarako Aizpuri eta Zubiaur lehiatuko dira. Lehendakariordetzarako, berriz, Miguel Sanz eta Viñes, atzoko kritikak aditu ondoren bigarrenak boto gutxi lortuko badu ere. Azkenik, idazkariordetzan ere sektore ezberdinetako bi hautagai daude: Santiago Cerbera berritzaileen aldetik eta Pedro Eza gaur egungo idazkariordea kontserbadoreen partetik.